

曬書堂集

曬書堂外集目錄

棲霞郝懿行蘭皋著

孫聯

蘇聯芬茹

萊陽周悅讓孟伯編

曾孫國

瑞國

斌鎮

同校字

卷上

賦

來牟賦

矮槐賦

枯柳賦

馬蘭花賦

明書堂外集
瑞霽頌

小草賦

七夕賦

再成英賦

書

與舍弟第一書

與李清苑學博書

與學博林皋言先生書

奉答阮雲臺先生書

奉方葆巖先生書

從趙序堂先生索書價書

答族外舅王金田太守書

答吳山尊學士書

答鮑雙五效選體爲應制詩

再與陳恭甫書

從友人索書價書

奉阮雲臺先生書

又書

又書

與王蓮墅求何首烏啟

再與王幼海太守謝惠何首烏啟

與鮑雙五書

答族外舅王復園學博書

與余次卿還騎書

代婉侔與王及人延慶學博書

代婉侔謝四史疑年錄啟

與王伯申學使書

與兩浙轉運使方雪浦

奉答江西撫軍瑋傅崖

答兗沂曹觀察使盧厚山

與莊杏園同年

又呈阮雲臺先生

敘

黃邑王母李太安人八袞壽敘

學博魏聖瑞四十一初度敘

含山敏軒王翁七十壽敘

歐陽靖園六十雙壽敘

張一山太守六十雙壽敘

冬日齋中看菊敘

花市買菊敘

硯影敘

卷下

解

楚地無冰解

夢屍得官糞得財解

大學格物解

宜兄宜弟而后可以教國人解

子釣而不綱弋不射宿解

老而不死是爲賊解

夫仁亦在乎熟之而已矣解

平王之孫齊侯之子解

書孔臯村天命之謂性一章題文後

書袁簡齋論語解四篇後

說

月言三夕集
四
葉公好龍說

醉司命說

泉法

攷

梓潼神廟攷

馬纓花攷

議

駿漁洋三議

墓祭議

服議

疏

募修延福寺疏

新建火神殿疏

爲辨明堯後祁姓疏

傳

饒母張孺人傳

贈奉直大夫賈公傳

蠹魚傳

小竹傳

記

安南記略

臨水亭記

王氏庭前小酌突泉記

文

祭張母王恭人文

祠財神文

討壁蝨檄文

遣蠟文

別集

狀

烈女林氏狀

烈婦趙氏狀

烈婦隋氏狀

烈婦范氏狀

爲蔡任氏入節孝祠狀

爲林明善入忠義祠狀

文

壽史毅庵文

于母尹輓帳文

劉母牟輓帳文

贈武略騎尉王公暨配翟安人輓帳文

附王太夫人諱照圓婉仝著

葩經小記序

列女傳補注敘

列仙傳校正敘

列仙傳讚敘

晉宋書故識

夢書題辭

讀孝節錄

松岑詩草敘

劉靜春古列女傳詩敘

記從表妹林氏遺事

聽松樓遺稿跋

曬書堂外集卷上

棲霞郝懿行蘭皋著

賦書敘

來牟賦

甲辰乙巳之歲兩江河南北大抵皆飢而山左尤甚延
及丙午之春時維三月因誦周詩感貽我來牟之語迺
建斯賦其辭曰

覽觀平原鳴鳥翔集魍魎狂奔死生至此修短甯論噫
嘻悲哉天平無辜人乎何尤彌年不雨三歲無秋菜根

難茁稗實莫收屋椽撤而星河入樹膚剝而粉榆愁吠
犬之聲銷境內哀鴻之影滿江頭則有繞膝佳兒牽衣
稚子顙頰朱顏凋零齟齬昔爲掌上之珠今作粟中之
粃朝逐隊於西村暮疊屍於東里道殣積而溝壑平螻
蟻聚而邱垤起又如弱女質錢親丁書券爲富室之青
衣充朱門之紅線閨中獅吼怯小膽之驚魂架上蒲鞭
殘如花之嬌面悲莫悲兮生別離期則期兮重相見攀
桃李兮恨青春望鄉關兮送暮雲無黃金兮贖蛾眉滴
血淚兮濺紅裙悲阿母兮贈遺言執巾櫛兮侍他人至

於蒙袂輯履聳膊埋肩形容枯槁舉趾蹢躅猛犬當路
健僕掩關退將安適進不能前枵腸久弱飢火中煎食
未三咽命喪重泉孝肥禮瘦割股剜肝骨未寒而肉已
盡目方瞑而膚不完雖旣餒之魂猶痛況新亡之鬼何
堪若乃鹿車罷挽鴛鏡中分文君未寡相如議婚戀藁
砧兮重回首曳綺羅兮思縞巾輿已登兮還復下遲吾
車兮秣吾馬糟糠恩愛兮諒不忘屢屢炊盡兮何爲者
又若青樓賣笑紅粉添嬌歌歌舞舞暮暮朝朝喧門前
之鞍馬雜閭外之笙簫妒鶯聲之蘇小憐鸚語之薛濤

紛纏頭之紅錦悵搗玉之藍橋莫不蕙心紈質雪膚花
貌飲恨而聲銷嗟乎誰無父母各有室家奈何昊天不
弔仰屋長嗟死者已化首陽之士生者猶爲水上之楂
沒者旣作寒灰之燼存者尙同藩溷之花甚至紈褲風
流金閨貞淑廷尉張羅中散下獄勢如沈淵形同轉燭
莫哀一飯於王孫誰貯阿嬌以金屋錦悵之桃根桃葉
儘多槩戟名門梨園之優孟優旃半是蟬貂貴族此其
忍垢含羞尤足傷心慘目噫嘻悲哉是豈九重之未聞
兮何帑金之屢發抑或七月之未誦兮何國課之胥捐

夫惟彼蒼之悔禍兮尙其迄用以康年甯流亡之不恤
兮諒呼籲之堪憐幸飴我以釐彝兮靳誕降於上天儻
復悠悠而莫我顧兮將同歸於盡兮夫何言

憂深思遠文尤警拔令人俛首至地不知鄭俠流民

圖能如是否

牟默人

矮槐賦

時水之南永平之道厥有樹焉支離菌蠢擁腫輪囷其
枝之蜿蜒而上也如騰蛇踞地昂首吸氣其下垂也如
虬龍振鱗舒爪拏雲婆娑偃蹇古怪蒼遒又如丈人痴
僂齊女宿癘盤盤囷囷蘊不知其幾百餘秋父老告余
曰此矮槐也相傳宋代所畱而莫詳其所由余觀夫黛
色餐雲霜皮齧雪密葉篩風老柯抱鐵長條鬱鬱參軍
髯耶古幹蹇蹇主簿短耶抑晏平仲之使狗國而軀不
滿五尺耶或臧孫紇之似侏儒而貌乎小丈夫耶否則

爾形不長而登裴晉公之綠野堂耶何貌不類於戚施而偃僂促縮宛如雞窠之兒或曰古有所謂將軍樹者此殆其奴耳余曰否此蓋智士所以斂其材而君子所以居於愚且夫主簿雖短而有筆如椽平仲五尺而齊國稱賢臧孫侏儒而智足多焉裴公寢陋而勲業爛然但菁華之內抱奚經麗之外妍彼龍門之百尺賴焦尾而後傳抑豫章之千尋經斧斲而不完維茲樹焉不矜材於羣木乃終老其天年異墨家之摩頂學端木之及肩樵蘇往來蔭其側風霜高潔掃其巔嗟乎草木何知

託處偏宜不憑高以自顯惟謙牧以自卑風枝雨葉蹀
躩參差數百餘年猶復嫵媚多姿而世之矜高材者率
皆彫落崩摧不免爲斤斧之所災後之覽者亦將有感
於斯槐

讀之鏗鏘可聽

牟默人

枯柳賦

庚戌之夏歸自都門感道旁枯柳生意猶存喟然而歎
九烈君聞之延入精廬授簡於余爰爲之賦自昔移根
靈和之殿別植長楊之館隋皇帝撫板渚而流連桓司
馬過金城而歎息觀其鑽火於春作絮於夏取材乎秋
含煙乎冬類達人之識時任用舍而靡疑至於長條踈
地密葉藏鶯灞橋贈其別恨章台綰其春情又復風流
自賞澹沱輕盈雖復濯濯王恭翩翩張緒詎能及其風
姿者哉豈意物換星移更幾何代而顛顚竟已如斯有

苑其條摧爲薪矣阿儺其枝織爲困矣世無匠石尋斧斤矣疴癢癭腫辱在泥沙煙霞暴露風雨爲家鴛鳥啄其外蝨蟲穴其間令人睨而望之如捫籥以窺天更有頑童稚子躑躅嬉戲羣遊而坐其巔甚至投火於中破腹而觀其煙然而木則有曷肄其復生側見旁出鬱鬱青青蓋許慎所謂再生曰枿孟子以爲吾如有萌且夫君亦知夫易乎夫盡而姤來剝終而復始今茲雖顛未盡其年自茲以往馴至參天向之兒童易而侮者將復愕眙駭囁并息吞聲而莫敢言鑄汝乎金成汝乎玉庸

詎知非造物者寓栽培於傾覆將以老其材而大其族
乎彼夫青牛出於文梓感喜變乎蒼松械有投而爲櫟
筇乃倏兮化龍此尤事之至異而理實類從者也於是
君驪然而笑騁子妍祕闢子佳妙僕雖不敏請從斯教
賦畢而出余遂登路回視向之所遇乃道旁枯樹而已

寄託殊深筆意亦復清秀

牢獄人

馬蘭花賦

本名馬蘭
俗呼馬蘭

丁未夏余歸自都門見馬蘭花叢生道傍與荆榛爲伍
蘊然傷之迺爲賦曰夫何茲物之草草兮悵寥落而寡
歡彼艾蕭之凡卉兮猶薈薈於崗巒何國香之苗裔兮
乃蕃衍乎道路之間懷遺馨於空谷兮尼父尙低徊而
延伫援瑤琴以寫憂兮聲朗朗而如訴奈何茫茫之大
塊兮曾一草而無地以託處御者指而告余曰茲其爲
草厥名馬蘭品卑形賤眾弗齒焉爾其葉如書帶花似
釵頭婀娜乎若翠莖之萑蒲髣髴乎若紫萼之牽牛余

迺恂乎若疑進馬蘭而語之天畀汝以馨香兮疑生是
之使獨地產汝於卑污兮疑汝生之不穀爾甯德天而
怨地兮抑將甘心而同此碌碌也猗嗟蘭兮使爾在天
爲蘭星兮將與白榆丹桂同其靈使爾在地爲蘭田兮
將與琪花瑤草比其榮使爾在山爲蘭嶺兮將與木蘭
辛夷齊其馨使爾在水爲蘭沼兮將與江蘺沅芷共其
清不然在人而爲蘭士兮人將服媚其香也在屋而爲
蘭省兮人將喜登此堂也在衣而爲蘭領兮人將棄笑
蓉薜荔之裳也彼芬芳竟體兮舉世嘉其令譽苟香祖

當門兮誰忍鋤而去之胡落落而難容兮竟埋沒於風
塵之內棄擲乎環涂之側生古道兮雜蓬蒿無人采兮
委荆棘夏雨集兮沾泥塗秋風酸兮落顏色猗嗟蘭兮
匪天命之不猶兮乃汝自殘之故也豈地之不汝容兮
繫汝託身之不顧也旣天地無可歸咎兮乃汝砥行立
名之不素也遂使元規之塵汚汝而無扇以自衛王元
之泥封汝而無計以自閉以至晉文公之土塊兮擲爾
而恨何以能平魯孔子之車轍兮踐爾而勢無以爲生
諒有媿於九畹之芳潔兮又奚羨乎飲露與餐英令楚

屈子見之而憔悴賈長沙遇之而太息宋玉遭之而悲
哀江淹觀之而於邑於是馬蘭若悲若喜如偃如起葉
低頭而下拜花含情而欲語御者告余以日暮兮余於
是迺登車而就路亂曰香草兮美人哀怨兮王孫諒干
古兮同恨又奚異乎靈均

瑞霙頌

有敘

嘉慶二十三年冬無雪

上有憂焉比十二月四日迺

命祈雪越數日雪黔四合霰飄驟飛灑庭除猶未霑
足越明年正月四日上天同雲六花雜下約四寸許迨
廿一日由晨迄莫約五六寸越明日又七八寸通兩晝
夜蓋三尺餘焉春陽布氣溫晏無風旣易消融復無漂
散其空闊積存猶餘二尺有半洵符三白宜麥之祥允
獻六出飛花之瑞謹操簡濡毫而爲頌曰

雲輕罨煖煙薄釀寒風無吹絮甕有曳紉於是歲初改
時履端呈火樹淪湯丸陳百戲集三韓玉霏霏而成屑
緜溼溼而未乾雨天花之散墮森銀竹之團欒檐隙仍
棲而凍雀江頭罷釣而收竿林異霜松田皆玉種遍滿
庭勁平鋪瓦縫室生白以虛明徑人蹤而錯綜瞻山則
巒壑鉤連眇隰而町畦統共灝灝乎盈盈乎積素充庭
雜之以瓊瑤而曾莫知其所用雖昏不夜似霽還陰窮
高望遠量厚測深心神朗澈氣體蕭森鶴衝寒而失影
梅臥凍而難尋渾九霄之太素異三日而爲霖加以恬

絕風颺霑同震柔全隱朱門乍輝白屋迎綵燕以表年
傍春旗而錫福柳飛絮其未蕸楊生花於枯木數恰應
乎白三功遞宣乎滕六時則皓首龐眉之叟白衣短褐
之朋舉觴稱賀比屋歡騰蝗鑽坏而潛遁魚負薄而難
勝寫川原以粉本樞帝闕之觚棱積輕塵而成嶽掩巨
壑之層冰於是撰畚鍤集擔簦揮長帚引巨絙忽晶瑩
其若失望陽旭之東升

小草賦

金風瑟瑟玉露零零柳將衰而始白荷已破而猶青響
閨中之砧杵亂草際之飛螢葉乍飄於金井波始下兮
洞庭時則蓮蕊初殘菊英未秀方丁蕭瑟之辰未屆凋
傷之候葉繞砌以無香疇共苦而爭繡爰有花花草草
紫紫紅紅向竹籬茆舍之間別添幽趣依瓜架豆棚之
側自媚寒叢供眺吟於晚圃憑裁翦於西風爾乃鮮逾
文錦彩若朝霞豔齊頰玉采絢丹砂牽籬落之朝煙蟲
聲滿地掛柴門之夕照秋色誰家晚蝶飛來抱幽香而

無語寒蜂攜去將冷豔以歸衙加以園內葵黃灘頭蓼
紫冉冉紅心茸茸蒼耳幾番疎雨煙寒橘柚村中昨夜
輕霜色老梧桐院裏寫出一奩罨畫半畝荒園排來幾
樹珊瑚千層錦里於是周容未去陶令來歸開蓬蒿之
徑被薜荔之衣小隱而鶴猿與共掩關則車馬方稀莫
不覽中庭之晚翠寄逸興於芳菲儻令移向東籬須作
黃花之婢妾試領羣芳西院應推白帝之嬪妃

七夕賦

瓠瓜稔歲酒果充庭值人間之巧夕會天上之仙靈冶
女棚開而筵啓妖姬繡罷而鍼停玉宇秋陽逢作麴曬
衣之日天街涼夜看牽牛織女之星爾乃水隔黃姑橋
通烏鵲七襄縱橫三歧錯落浥細雨以湔裙織寒煙而
張幕亂鳳管之鏗鏘飛螢鐙以煜爚畱澹雲之一片恰
展羅衣滴濃露於三宵新垂珠箔維時魚闌沈鑰鵲漏
移籤繡婢展圖以張案花鬟當戶以卷簾席分班而肅
布香拂袖以輕拈膾切同心擎去而金盤簇簇鍼穿雙

眼捻來而銀甲纖纖至於深宮婉變永巷嬋娟碧桃階
下青鳥殿前臨百子池旁而作樂向中天臺畔以開筵
隱樹色於昭陽合歡葉閒聽鐘聲於長樂連愛絲牽旣
而北斗橫西庚爛步障收諸姬散望曉轉於玉衡睇清
流於銀漢最愛千花綵朵渡河而吉慶偏長須看萬字
蜘蛛結網而纏綿不斷

再成英賦

以若升高必自下爲韻

覽往籍之遺文寄逸情於邱壑列體勢之欽巖窮岡巒
之岑嶠厥有英焉再就斯名神工攸託嶺銜日曜儼冠
珥之重光峯矗蓮華疑芙蓉之疊萼巧逗煙鬟之狀擬
邢尹以猶非工添璧藻之形方穀蒲而差若當夫宵岳
鶴宿曉岫雲騰夏嵐雨洗秋壑煙凝如累基之遞構似
覆簣以頻仍因而重之幾若以多爲貴維其卒矣居然
踵事以增比竿影之高懸還求進步同岑樓之蔚起更
上一層固屬神靈之鍾秀應象坤巽以階升至若天晴

海嶠霧斂江皋峯迴掩映嶺抱周遭翠微上而未及重
甌壘以猶高儼孳華於河邊須多一掌如浮根於水上
定冠雙鰲宗炳圖中加寫礬頭而著色郭熙畫裏更飛
墨瀋以添毫雲臥而衣應倍冷句陰則首欲頻搔若乃
峭插天關靈探石室薜蘿將巖穴俱幽霞靄共林霏交
失殊竝峙而爲岫恰連文而成出憑兩端爲結構宛斷
蜂腰本一氣以鉤連眞成鶴膝丹梯旣步以猶疑碧落
將通而未必觀其並影參差孤標秀異五丁欲鑿則宛
轉以無縫萬笏將攀羌崎嶇而靡自本質有而趣靈旋

神交以形媚人蹤斷處登巔而尙恨難窮樵徑緣來絕
頂而翻嫌未至合如岡如陵以結體一色浮青分艮上
艮下以成形兼山聳翠彼夫曠覽平原流觀迴野一成
緣積而加多三襲應分以益寡望點點於天中瞻纍纍
於日下玩瀑布之飛流慙詞源之倒瀉感味象於寸心
昧忘言而獨寫儻寓意於樂山願怡情乎爾雅

自是君身有仙骨不媿名士風流

王古邨先生

與舍弟第一書

告懿林陶徵士詩眾鳥欣有託吾亦愛吾廬子曾子云

勿寓人我室毀傷其薪木

案此用孟子書新序則云魯人攻鄆鄆費會子辭于鄭君

日請出寇罷而後復來毋使狗豕入吾舍仁山金氏言會子書有此事作魯人攻費戰國策甘茂亦言會子處費然則武城即費邑歟古人於居處什器意所便安深致繫戀如

此吾與爾同氣雖無分別但吾廬之愛豈能忘情薪木

無傷鳥欣有託吾意拳拳爲此耳莫謂汝嫂臨行

去年十月

來都封鎖門戶便爲小器此亦流俗之情宜爾也吾輩非

聖賢豈能忘爾我之見今人媳婦歸寧往返數十日尙

且鎖閉門庭收藏器皿豈畏公婆偷盜哉蓋此兒女之私情雖聖賢不能禁也吾與爾老親在堂幸尙康健故我得薄宦遊遑膝下然亦五六年後便當爲歸養之計我與爾年方強壯共財分甘日月正長而吾親垂垂已老天倫樂事得不少圖幾年歡聚耶我西家房屋及器用今年六月一日大雨汝須畱神照看勿寓人我室令有毀傷庶吾歸時欣鳥有託此亦爾守器挈瓶之智也言至此不覺大笑汝莫復笑我小器如嫂否所要硃砂和藥今致二錢頗可用惜乎不多耳應泰近業如何常

至城否見時可爲我致意逢辰及小女兒知想大爺大
娘否試問之桂女勿令使性懶惰好爲人家作媳婦也
醫方便覽二本未及披閱俟八月寄下呂氏春秋祕書
二十一種便中寄至京俟秋冬間不遲我新病初起意
緒無聊因修家書信筆抒寫遂爾絮絮不休讀畢大家
一笑更須藏此書畱爲後日笑話也嘉慶五年庚申七
月八日哥哥書

與李清苑學博書

李安邱人

世臺先生清行潔躅同符前脩深可欽佩世晚偶讀漢書緬想貴鄉有清齋太常瘦羊博士今其墳墓猶尙存不甯可稽尋之乎若知其處者斯亦桑梓之餘榮也又有孫嵩郎宗名行亦著此其人皆有後不

答學博林皋言先生書

九月十五日都中妖賊竊發擾及京輦于時九門不啓大索十日行旅稀絕走京者俱望國門而返此實非常之變乃者九月廿一日手書于十一月十八日方行

收到今十二月二日甫奉答書非敢緩也委察一事緣
改教本班出缺甚少得缺尤難先生以祿豐令請改教職需次年餘消息邈然
十月內旣未出缺至此月曾否有缺尙未可知寒穠舊
物望眼欲穿熱宦何人熏心如醉令人輒喚奈何也懿
行宦况窮迫難支明歲恐要作京外之遊亦不得不然
耳今年春間忽嬰疝病至今未差衰病相侵諸務都廢
壯年行事那可復追恐終作老馮唐矣伏惟大小安善
餘無可言

奉答阮雲臺先生書

頃於九月初入接奉鈞諭未及奉答而遂有十五日邪
民闢入 禁門之變又於十月十四奉讀手書敬悉以
魯宋阻兵恐梗運道將船編伍聯行以防鈔掠復於朱
野雲鶴年齋獲讀手札以每船選壯士五人密加團練
用資戰鬪而衛行旅二者實守戰之要圖時值倉猝計
出萬全札言十月八日行抵棗昌計今半月有餘全幫
應抵淮安布颿安穩行人無恙曷勝禱切之至都中近
日諸俱安帖而追思前日之變猶爲心悸扼腕自憤不
能控拳禦賊如金日磾張安世之爲也賊之屍骸縱橫

市口懸其頭首允快人心賊旣造滔天之惡天亦顯未
有之奇鈞諭以爲天之愛

帝信不虛矣戶部員外郎舒寧言先是廣東白蓮教之
妻子分給八旗爲奴有葉氏婦者於十五日夜間聞雷
霆聲啓太夫人曰傳其此教聞雷聲起便當破滅今此
得聞其應至矣俄而林清擒逆黨獲捷如響應信知斯
語非謬而八月十三夜枉矢西流占爲急變應亦顯然
又前年夏彗星見北斗近紫微垣天象昭明

帝心簡在乃今十月初三初九等日僉見太白熒惑二

星迫近於月初十日雨未覩星光淺學私憂恐賊之餘
孽投伺間隙而申嚴警守枕戈彎弧內外協心自當有
備無患戶部主事宋潢言六月某夜雷雨交作室內歟
覩光耀異常急啓窗看赤光竟南大如數間屋光中黑
氣如柱侈斂靡常良久弗滅亦未知是何眚也懿行亦
於五六月中初昏十餘刻後頻見雲霧四塞夜幾中而
復晴如此非一私竊致疑將恐日入愚作莽有伏戎初
不虞妖賊包藏禍心敢竊闖窬於輦轂之下也故知天
祐我國家終當妖不勝德謹就見聞質實可據者詳

著於篇俾後來有所稽考焉懿行半載以來時患偏墜
之疾爾雅之業久未料理筆墨荒蕪惟夫子董而正之
前賜讀文言說數條茲復蒙示釋訓一篇將俟病除融
會二書要言登入爾雅義疏又承示列女傳詩一冊

先生

側室靜春居
劉夫人所著

文詞清雅大似傳讚懿行之妻王氏奉讀

歎嗟深所賞慕但其人先患疾疫今才平復須俟從容
撰敘文訖再當呈正建聞一疏遂不蒙施行然異時恐
復當爲碩畫也癸酉十月廿一日

案戊寅夏四月九日宋又爲余言丁丑七月十三日

夜半後大雨復見赤光竟東南大於往年所見登樓俯瞰黑氣下屬地旁若燈籠夾之放大光明其黑氣西邊不動而東翕張靡定比曉乃滅

案漢書夏侯勝傳勝當乘輿前諫曰天久陰而不雨臣下有謀上者陛下出欲何之晉書苻生載記太史令康權言於生日自去月上旬沈陰不雨迄至於今將有下人謀上之禍生怒以爲妖言撲而殺之

奉方葆巖先生書

月之初九忽接訃音奉讀未終銜碑曷極敬惟太夫人

淑慎溫恭孝慈懿惠含飴錦里封鯉江鄉兩世披一品
之衣雙鬢奉九仙之杖固已珍分極葉

先生歸養奉
旨賜人蔭

榮賁翟華甯徒閭里之光實行栢椿之澤惟是夫子循
陔致養愛日彌殷謂當年過期頤奚僅齒逾耄耄何圖
慟靡依而銜恤正值逢落葉之驚秋慈烏助以夜嘯警
鶴增夫晨怨斯固杖桐之絕痛而撫竹之至哀者矣第
思毀瘠不形禮經攸重伏望敬誠襄事容貌稱情庶令
孟母之遺徽於今未沫勿若國昭之行禮我喪斯沾敬
獻微忱聊伸菲奠詞不具宣幸惟鈞鑒嘉慶癸酉十月

十七日

從趙序堂先生索書價書

前經奉問興居未悟爲悵啓者某謀生術拙官項私逋
無可爲地以醫書爲活計仰荷垂慈代爲銷售若干銘
感之私非可言喻卽今歲事將更公私交迫質錢有帖
避債無臺交絕孔方形蹤落落入臘以來所收書價如
可陸續賜交俾得償還宿負不勝鉅幸再尊處書多儻
有散不盡者不妨暫行擲還俟明春公車來時有可散
處再行奉上餘惟慈照不宣

答族外舅王金田太守書

戊辰

客歲夏秋奉讀手諭敬悉一切萬里還書諸承殷注感
何可言緬惟族外舅大人十載平反霜凜西曹一麾出
守風清南詔蒞任以來積年塵案雪彼沈冤牟利滑胥
窮其奸狀同轅觀罪分劔追財古循良吏何足以云比
聞委典瀘銅必能剔除叢弊阜國財求榮聞遐暢并慰
如何某農曹需次補缺尙遲疎拙爲官清貧日甚雖著
述頗多而非醫貧之具又我輩但能著書不能刻書刻
書者必富家兒以此艱苦倍深浮情轉淡還讀我書聊

以自怡而已今歲春初內弟北上承割清俸惠賜甘金
莊魚得水范甌生煙未足喻茲樂也久稽裁答藉抒積
忱感荷之私不勝悽悽內弟夙資異稟暫蹶春闈自當
老其天材近客潞城姑爺處延爲西席正須摩厲期在
來春南望停雲遙情屢阻伏惟近履綏和上下甯吉內
人去冬復有弄瓦之喜兒子文翊今甫八齡延師教讀
頗不頑鈍恐塵慈注聊復言之不盡

答吳山尊學士書

前以同年莊賡唐之太夫人壽文奉丐者以兄工筆且

負重名足爲親交光寵也不意方事之殷復有倩兄爲

葛龔者

來書云前因爲人作巡幸淀津賀冊五六件未暇爲同年作壽文今已畢矣望將節略仍付

來三日必繳云云

俾弟失望而祝期已迫書屏者又操之蹙不

令稍寬假弟萬不獲辭丙夜翦燭摩挲眼花點竄而成時漏下三十餘刻矣本意規摹尊作欲如廬陵之倣史遷不知乃成壽陵之學步也深慙蕪拙不足可觀欲削投之而無以應命猥以康瓠而贖周鼎羊質而冒虎文甚無謂也兼復濫託盛名徒勞虛造覆閱之下倍益汗顏謹錄呈拙製仍鈔斧斯其文登諸屏端已廿有八日

矣爲兄殷注聊復及之一二日後還擬奉訪前呈校正
竹書紀年本如已閱訖卽希削政并擲還

答鮑雙五效選體爲應制詩

佳章中邊皆美色香俱備自是魏晉餘波非同齊梁綺
靡弟久抱偏痾遂稽良晤積塵凝席枯管委牀忽枉璫
賸兼飛珠唾持頤滌露搔首披雲宿患頓除塵袞遂豁
無能奉步祇供怡神肅復惠音容遲趨謝餘圖面罄惟
照不宣

再與陳恭甫書

梅脩先生同年閣下四千里外五六年餘離思轉深古
情逾淡讀書少暇搦管沈吟良友相思何能已已緬惟
閣下循陔致養奉檄辭榮兼之槐市生徒板輿周歷家
園眞樂菽水餘歡弟薄祜食貧代耕乏祿賣書度日索
米經年乃雖師友間羞作寒乞相自惟疎拙甘守堅窮
而已然爾雅之業屢經削草卒未成書期以二三年間
粗當了畢便可逍遙無事去住自如比舍親官溲致何
首烏新鮮傑大將充服食佐以導引自今以往儻復老
健不衰久恩郎曹亦未可定大抵如晚花秋燐冷韻幽

香隨他飄墮不足關懷也年衰計短無可營生近住海
岱門東齊魯館地頗閒曠將謀授徒自同食力但恐寒
氊無分晝餅藥飢耳雖此等事亦當有數非可強求也
聞穀士兄言閣下雖復在遠常念其飢寒形於談次爲
可銘感知勞存注聊復長言前書具悉藉候近祉不宣
從友人索書價啓 丙子秋

前丐銷書極承雅意今從乞價似涉俗情祇緣索債登
門更甚催租敗興望垂厚愛俾免追呼速惠版金稍酬
紙費肅茲布款希宥不宣

奉阮雲臺先生書

冬間伏讀朝報敬悉以編伍有方遂令妖賊授首撲燎
方揚防川未潰力微功鉅爲民造福至無量也江西居
荆揚中流控引襟帶作鎮東南雖莽有伏戎萑餘藏盜
披根引蔓指顧可平矧當桴鼓無驚江波清晏之會哉
懿行久患偏疝尙未就痊荏苒歲餘蟲魚輟注分陰可
惜良以慨然歲時行盡節物感人伏想尊履佳安不盡

又書

乃者冬間夫子以奉覲入都勿勿靡暇仰止末由僅從

稠人儕偶中略申瞻謁未罄鄙私深以悵然竊計夫子
出都之日應須新正初吉方抵武昌卽今疆理旬宣宜
取次了畢江漢上流自昔方叔召虎舊嘗從事之地謳
思流韻行當復覩於今也猶憶前窺尊範蒼白改觀自
緣積慮勞形所致尙冀少加調攝千萬爲珍頃承慈注
惠逮卅金歲盡冬殘煙生塵突欣荷無量懿行比託福
蔭賤患尋差體氣亦佳良以欣快肅茲奉布稍抒微忱
兼申謝悃附請鈞安不盡

又書

歲除之前五日節物催人梅寒徹骨忽蒙慈注遙惠炭
金黍谷生春葭灰送煖感何可言敬惟夫子鈴閣疑新
鼎祠集慶下風承聽欣抃難名自頃移節漢陽秉旄嶺
海坐鎮百粵控引重洋體大務殷數倍荆郢伏望精勤
綜要愛嗇頤神曷勝切禱懿行病疴首尾三年去歲至
今漸能平復本欲覃思爾雅近緣謀食授徒每共諸生
論談時藝治經一事遂乏專精兼之男女嫁婚米鹽淺
雜期於一二年内擺脫屏當庶訂蟲魚畢殫精力然後
心如不繫之舟可得優游消歲月耳川陸絲曠如隔遙

天詞不宣心仰希鈞鑒

與王蓮墅求何首烏啓

河水結凍甌水知寒緬惟足下榮溢洛濱聲高緱嶺花
封膺篆棠蔭宣風直須指顧間耳愚年迫衰殘病貧猶
昔唯夙嬰偏疝今竟就痊飲啖亦佳知愛如兄應爲我
稱快耳夏間惠寄何首烏益裁未茁如可再覓數枚魁
大新鮮資頤衰老不減饋貧糧矣卽頌升祺兼申潭福
不盡

再與王幼海太守謝惠何首烏啓

十月廿九日鐙下作書於十一月三日由蒙自人主政尹名佩珩處轉致計明年正月內當可塵覽旋於十一月廿三日接奉福太守所帶八月十六日書兼收到何首烏十斤萬里注存歡騰肺府靈根傑大遠邁恆珍會應製以米泔蒸以黑菽丸以蠶釀下以沸湯資養衰年感深沒齒叩頭南望未罄謝忱也賤恙近痊頗能飲啖將來郎署多恩幾年亦未可定願未知向後何如耳自頃移居齊魯館地頗閒曠將謀開館授徒少資生理既遂吏隱又欲變秀才爲學究矣儻語知交應同一笑

與鮑雙五書

地偏心遠不獲時領快談以爲笑樂恨何可言比因賤
恙小差未治經業偶然興發或效蟲吟自顧非詩人之
高致又缺良友之切磨鷹集泮林徒增嗤點近因求石
王式葦侍御兼呈此冊其人默爾不肯雌黃仍以見還
竊念詩翁在邇安可因莛撞不足起音便爾望門裹足
因遣下走事同獻芹切望從實糾彈痛加削正勿徒季
野陽秋幸甚容一二日間遣人走領久疎良覲聊代面
談近日開溝動多坎陷容俟少間奉晤爲歡

答族外舅王復園學博書

十載氈寒九秋鴈斷燕齊相望風雨遙思諒夙垂雅愛
異地同情耳某久滯農曹一官匏繫買書索米積歲經
年望喫豬蹄如嚼麟脯矣尺書久闊一笑爲娛此不多
申

與余次卿還騎書

前承惠騎誼重共裘遂服安驅久資代步車行旣駛毛
相復佳每屬僕夫勤加飼養誠珍仁人之賜兼軫念其
衰殘也乃者入夏以來屢形僵仆數人扶掖移時方起

良由後足舊嬰寒溼齒衰增劇之故耳弟自思念無福
騎乘恐辜良友之贈又慙貧乏芻秣未充嘗感子方老
馬之義竊惟孔聖借乘之仁謹命右牽事同反璧卽希
收納兼亮謝忱惟照不宣

代婉佺與王及人延慶學博書

數載分張久睽音問緬惟賢姪坐擁書城文探學海等
身著述欣企如何愚姑少涉學津晚窺書圃比緣閒暇
不揣愚蒙遂依劉子政之文補曹大家之注自惟疎淺
貽笑大方海內通儒謬加讚賞茲寄奉二十部求代籌

五十金非欲贏也蓋有以也緣愚姑比年以來爲先慈
建坊一事工用殷繁多方籌措譬爲山而覆簣期集腋
以成裘不量力於愚公妄希蹤於精衛敬求大雅俛鑒
愚誠廣益嘸枯俾資綽楔寸心銘感沒齒弗忘其書價
銀請俟來歲夏秋寄京爲禱特茲布懇藉候文祺兼道
慈幃萬福暨潭祉均綏不盡

代婉佺謝四史疑年錄啓

阮芸臺先生之側
室劉文如書之撰

去冬嚮杪遠承慈注惠逮新金兼蒙頒賜新書懿行之
妻謹以祇傾刻卽開緘披尋未竟欽挹良深因念每讀

古書如伯奇蔓子北宮嬰兒趙母之倫世繫無間生年
莫攷未嘗不流連嘅嘆不能自遣於懷今讀是書英賢
羅列卽目如存會心斯在方覺錢氏疑年錢辛楣有終
疑年錄
成望漏儻復旁涉六朝下沿五季益當清絕滔滔囊括
百氏矣竝屬寓書略申此意兼致謝忱懿行遠疰福蔭
兒子雲翼幸以成婚爲比來佳事餘無可言己卯二月
十六日

與王伯申學使書

奉別以來僣將再稔未通尺素傾注如何伏惟大兄高
材碩學海內所欽著作承明蘭臺繼躅乃者懋膺

簡命視學中州輶軒奏言實兼茲選二南故典籍之淵
林三川實人文之舊地洛陽賈生里居安在汝南徐孺
故宅猶存偃師輔嗣墓間守冢尙有幾家召陵公乘里
訪許君今復有後不耶至於二室三塗地形可按桃林
慕休牛之風孝水嘉濯纓之蹟凡于役所經可以證經
史攬輿圖洵足樂也前者出都會有欬嗽之疾比加調
養知當平復但遇秋冬尙須防其間作計取溫羅爲佳
耳嵩山何首烏以大而新者爲勝此物甚能滋益如得
此者庶望波及其餘以踐宿諾幸甚

嘉慶十四年己巳六月十八日

與兩浙轉運使方雪浦

理齋餘閒時多佳勝賓朋詩酒觴咏湖山相對歡然懸
知閣下吟編成帙企想爲娛某久溷緇塵無情面目空
令山水笑人兼之養病數載益復支離寥落寡歡今茲
二月中旬復因技癢仍訂蟲魚義疏欲償前負思了宿
緣此書若成自謂其中必多佳處恨川路悠長未獲追
隨左右賞奇訂疑若惠施之遇莊生也此書期以二年
當可了畢便欲挂冠身作閒人將學劉生負書獻沈侯
車下耳枵腹爲病曼倩苦飢前丐銷書尙冀速濟涸鱗

明倫彙編 家範典 卷一百一十五
三
俾窮愁著書人無憂薪水之艱幸甚感甚久稽音問藉
展闊枕稍攄情愫兼頌佳安不盡
庚辰六月日

奉答江西撫軍瑞傳崖

蠶牙映日鈴閣生風緬惟節下控鎮衡廬遙分翼軫由
開藩而登開府八座依天旣允武而兼允文萬家安堵
某落拓一官歡騰五內荷蒙垂盼欣抃難名謹奉蕪牋
稍申雀賀藉攄微悃恭頌鼎祺不宣
六月十八日

答克沂曹觀察使盧厚山

灑澹宣勞救寧著績緬惟閣下恩翔曹鴈德翼魯鳩待

舉火以萬家隨車膏雨瞻棲糧於千畝彌野稼雲某誼
切鄉關情殷抃舞入秋以來想應葳事伏惟新社清勝
爲佳肅勒蕪酋遙惟荃照兼頌潭祺不盡

與莊杏園同年

莊荅州人名
詠字賡唐

數載睽違未通音問緣弟病疝三年經日藥鑪百爲俱
廢客秋小愈近甫就痊耳雖根株尙在而體氣漸佳較
之臥病呻吟便如釋重負矣近與令姪琪園水部周旋
具稔大兄開館授徒采蘭色養歡欣無量迴思一行作
吏拘苦萬端方知塵網羈人不若脫然無累落得此身

自在清閒也弟投老殘年宦情久淡所以未能引退者
非有所戀徒以無家可歸又恨力絀無處買山而隱然
思歸之念固無日而忘也猶憶吾兄前守饒安三兄來
都弟附書通問未蒙賜復豈爾時因有註誤之件意緒
恩粹偶爾遺忘耶弟近欲醫貧亦思教讀而生徒寥寥
館金又薄令人喚奈何也蘭陵王涑水步曾豪爽可人
遽聞凋謝同譚益增寥落之歎矣王與莊俱同戊申鄉舉卽頃近
祺竝問潭府嘉綬暨請慈侍福安不盡庚辰十二月三日

又呈阮雲臺先生

半載以來竟缺問函實緣攷訂爾雅義疏勿勿未遑歲
莫復蒙慈貺畀以脩書之資感深挾纊今茲二月半後
所爲義疏當可粗畢尙須子細點檢一番便付鈔胥爲
寫副本將擬攜書爲贄作粵中之遊比聞夏間夫子便
當入覲幸獲藉親師範快慰如何

黃邑王母李太安人八袞壽敘

嵩岳王君客棧者二十餘年邑中無少長莫不稱道而
欽慕之而與予交最久其人德器深醇不爲疾言遽色
恂恂然若未離父兄師長者予固意其淵源有自後遇
黃邑人間談及君家世始能備悉其由來蓋得之壽母
李太安人之庭訓者爲多也太安人孝敬慈惠而節儉
雖處豐厚無異寒素然施與未嘗有吝色於宗族戚好
之貧者必延至內庭詳問所需而給之多寡以緩急爲
率其能識大體類如此太安人居家處娣姒無間言下

及婢僕臧獲輩亦遇之有恩而教子尤以禮子侍側未嘗不如對嚴君蓋數十年如一日云嘗聞古之人有稱爲女士者謂以壺範而備士君子之行也如太安人居家訓子毫髮無憾雖賢人君子無以過儻所稱女士者非與抑詩之言曰釐爾女士從以孫子又曰介爾景福以余觀太安人嗣君王樹亭亭三株並秀且也年登八旬壽而康焉福亦隨之矣茲復躬遇

覃恩親膺

九重褒封之典以輝煌其家世則天之所爲報以景福

者又豈有涯哉夫壽之爲言酬也故積善必有餘慶而
令德徵於康強吾以是知太安人之衍慶殆將與日繇
繇而所謂康強者又將日進無疆矣余得交嵩岳君久
旣備悉賢母之徽音而嵩岳君以今年四月將爲太安
人榮壽之慶予雖不文然深慕嵩岳君之孝德而夙仰
太安人之懿範有不能默默無言者爰書此以爲之祝

學博魏聖瑞四十一初度敘

代

平壽之間膠濰二水環其左尋灌兩斟據其右其地平曠而少山其土沃衍而多稼得雨澤則倍收其利魚鹽蜃蛤商賈舟車之所湊而富人之淵藪也往者乙巳丙午之間東省大祲登萊屬多飢人矣余以事過濰則城郭喧闐如故以此知其富倍他邑焉聞古之至人嘗以多藏爲戒而養生家乃至以富爲腊毒雖堯辭華封之祝亦曰富則多事壽則多辱有是哉聖人固不欲富乎而且以壽爲辭耶然洪範之陳五福一曰壽二曰富何

也豈箕之所謂福而堯之所必辭歟美舜之大德亦曰
必得其祿與其壽豈舜之所應得而堯之所弗居歟余
則以爲此特莊生放達之言爾人生在世可富可貧貧
亦何病富亦何仇要在貧不徒貧富不徒富爾作平等
觀維富與貧皆若浮雲塵俗中人不獨貧難富亦大難
况又有進於貧富者乎古之人如陶朱公亦可謂善居
富者矣其取也如鎔銖其散也如泥沙故曰積而能散
不然守錢虜爾今世如此人何多也而聖瑞魏先生亦
可謂善學陶者矣先生庚申副車以學博莅吾邑邑之

士多貧而先生特以富聞然士之謁見先生者道其謙
且和樸而不華又言能施予宗族鄉鄰或待以舉火貧
無資業之士或藉以成名也雖之人素知焉今世如先
生不亦可謂易其所難歟聞先生五歲而孤少長知讀
書雖克自成立亦賴有慈訓處同堂兄弟無怨尤以未
深悉先生家世故不復多述焉然卽富不驕吝之一節
其亦庶幾超乎流俗矣先生年甫逾不惑邑士之願壽
先生者咸藉藉迺來請敘於余余非能以文壽人者也
無以塞眾之請輒舉洪範之辭曰一曰壽二曰富又反

莊生之言曰富不多事壽不多辱眾咸曰善因書以爲之敘

含山敏軒王翁七十壽敘

含山於和州爲西北面江背山峯巒秀而水泉清靈淑之所鍾必有隱君子出其間則封翁敏軒先生其人也王於含爲詩書舊族自高祖中翰公以國初名孝廉起家實王氏發祥之始曾祖父考授州同暨祖父俱紹家學爲名諸生父太學生候選巡檢 馳贈奉直大夫子男二人長卽封翁次日鷺洲翁生而穎異天資孝友甫十齡遭母見背先後奉嚴毛兩太宜人事之如一終始無間言人以爲難弱冠授室遭父抱疴偕新婦調湯

藥歷五載無惰容寢食爲廢者屢矣迨父卽世毀瘠之餘念弱弟甫成童雖延師教督猶時時躬訓迪期早成名庶酬先志也家本素封中年食口繁漸以支絀念與弟異爨薪米尙足敷不致以家計廢讀亦承先志也自父在時雖年少已知篤學無寒暑輟應童子試輒冠曹偶邑中諸耆宿以遠到期之後丁內外艱躬持家政不獲肆力於學而以先人期之厚自以不得取科名爲憾遂援例入成均亦猶承先志也乾隆辛卯甲午兩赴南闈薦而未售於後遂罷試家居以授生徒訓子姪爲任

和含從遊列膠庠者後先相望弟鷺洲亦補博士弟子
員人稱難兄之力也其學務實不爲浮華所著制義原
本經術生平守正寡交游不能隨俗所爲文如其爲人
讀書安貧以詩酒自娛著有諾諾夫草堂詩集藏於家
與人居和而有介處姻黨間取受必嚴於公事尤絕干
謁鄉里奉爲楷模焉夫福之爲言備也壽之爲言酬也
翁砥德績學爲閩里宗足以發聞於時而潛光未曜介
節徒貞可謂窮矣德配李宜人以中年不祿賢嗣二人
長若閔業儒次若閔甫七齡翁迺以嚴爲慈訓養兼至

凡二十餘年可謂遇之艱也若閔以嘉慶戊辰成進士
官主政供職農曹恂謹自將固知得於庭訓者深年未
踰立連捷取科名翁宿憾頓釋天所以報之者又何豐
耶今年己巳恭逢

萬壽覃恩以子貴 誥封奉直大夫於是翁年登七袞
身以康彊子孫逢吉福既備矣壽且酬焉可不謂遇之
隆哉農署諸同人擬遙爲祝嘏屬懿行爲敘懿行非能
以文壽人者謹述所聞不敢以世俗之辭進懼其涉諛
且失實聊質言之不計文之不足以稱也爰再拜而爲

頌曰含山兮蒼蒼江水兮洋洋有隱德君子歸然如見
山高而水長

歐陽靖園六十雙壽敘

代

惟嘉慶十有四年歲在己巳

皇帝春秋實符大衍之數

聖祚無疆普天同慶渥霈洪庥用敷錫厥庶民及有位
於是廬陵封翁歐陽靖園以子衡官郎中 晉階中憲
大夫暨配李恭人俱膺殊典爲閭里光衡將以明年秋
假歸省覲因舉椿萱並壽之觴鄉人以衡與余舊嘗從
事司農知其家世請一言以爲祝余非能以文壽人者
顧嘗聞吉人言靖園有厚德樂施與內行又醇教子有

法度爲鄉黨及四方人士所傳道年甫耆壽身被

恩綸有子二人今復有二孫足以娛老性恬靜不樂仕進偕德配躬執勤勞崇節儉守家室田園之業屏絕豪華無富貴習氣允爲人倫楷模熙朝之人瑞而豈徒爲閭里光哉蓋嘗以爲士大夫居鄉有居鄉之事業處家亦有處家之事業非必莅官行政但隨其所在自盡於己有利於人足以教後世亦可謂施於有政矣斯二者靖園蓋兼有之而又不以自功也嘗客遊衡州值歲大祲人鮮食出私財以濟飢乏曾無德色卽平生契好者

亦不令知也晚近風俗偷薄鄰里鄉黨有緩急不相賙救又多藏以居奇甚或陰肆侵吞坐視溝中之瘠而等之秦越誠得樂施如靖園以之居鄉必能化薄俗長仁恩俾豪強兼弁者薰其德而善良可爲居鄉樹典型者也豐厚之家驕淫奢麗紈綺之習易縱難馴乃至伏獵蹲鴟貽譏通識否則意氣飛揚觸文網而望吏議者不能以數舉靖園之教子也致書數千里訓之以勤職敦行讀書取友以故其子年雖少不失爲恂恂謹飭之士其所勸勵有素也誠得善教如靖園以之處家必能重

義方端習尙俾桀驚難馴者聞其風而自息可爲處家樹典法者也此二者足以壽靖園矣至其處家與伯兄居內外無間言其在衡州施茗粥無虛歲居家間京師同鄉公議勅建必遺書誠子勿惜重資是皆人所習聞眾之所知今亦未能縷述也夫世之以文壽人者率鋪張揚厲譁囂盈溢又或稱述德美文富詞繁而余僅以二事壽靖園者將以黜虛崇實又竊慕古人贈人以言勉人以善之義而願與當世士大夫爭自濯磨化民成俗斬世風烝烝日上以無負

聖天子壽考作人之至意而後世有所觀法而慕效也
因書以告我鄉人并爲敘

格律謹嚴議論亦渾厚古質無非積卷之氣

陳稽亭

張一山太守六十雙壽敘

皇帝五旬萬壽之明年七月某日我一山寅伯大人暨
德配王恭人六袞榮辰農曹諸賢將同舉康爵之侑屬
製文爲獻懿行不敢辭爰拜稽首而爲敘蓋時值承平
上有

壽考作人之君下有天壽平格之臣惟二三執政暨牧
守各端已敕躬登斯民於仁壽而亦爰及於乃身永膺
多福施及子孫爲後世光不其懿歟求之今日惟公其
人也公自先世以詩書長厚起家迨公橋梓俱以科名

顯賢嗣三人又聯翩登仕版四方人士知與不知咸推公循良之報焉公幼而敦敏沈毅有爲天性孝恭而能廣恩施於不匱自爲校官洊厯郡守封翁皆就養又慕范文正之風置圭田五百畝贍族人之貧者嘉慶壬戌值歲祲鄉里無糴處敕家人出藏粟減糶以利農又以千金爲族人某籌交代而免其罷官同鄉縣佐某以官虧被劾且就逮爲輸三千餘金以濟其阨蓋輕財喜施予如此至於取受又未嘗不介然也方公以刺史守通州有宋龍圖學士王觀家在此如皋其兆爲定惠寺僧所

占冢且平王氏與僧構訟厯前明迄今幾二百餘年官不能理公以王氏詞直判歸王而僧以誌載龍圖無後爭於是就僧牒判曰但是工壘卽不宜平無後且然況有後乎竟判歸龍圖裔孫景沅等且勒石以絕爭端焉同時邑有金節婦爲夫弟誣以不孝而陰圖其產者邑紳廣文某以八百金故右誣者而傾節婦官已斷離矣公覆之立雪其冤士民稱快當時有龍圖節婦之謠謂此二事也上海有田主人偕傭耕作傭與鄰田爭毆而傷人致斃者傭卽遁官以授意坐其主已誣服矣主人

之妻聞而自經公被檄覆訊研鞫得實卒坐傭而主以
全活一時歌詠其事稱神明焉厯官端謹請託不行而
於興革諸大政輒以身先南匯縣治瀕江帶河歲久淤
淺商民非潮汐不能渡人患苦之定議疏濬擇邑士勤
慎者董其成不假胥吏手計河身四十餘里未終月而
畢卽今所謂閘港河者也邑故有橋當上海奉賢諸邑
要衝年深傾圯爲蠲廉興修民以忘勞邑瀕海廣斥莠
民多嘯聚爲姦數官無如何公陰募壯士刻期俱發躬
率吏民出不意邑人不誠而從者千數百環其三面賊

駭逸獲渠魁及捕虜數十人海隅以清令婁縣時民艱
食事聞於朝得貸給口糧於是按戶籍分極次貧俵
散必均或貧無以償者悉焚其簿而代輸其租費且以
萬計南婁二縣至今稱之公尤嗜學工書喜讀所居室
書硯羅列公餘以自娛滋陽牛階平先生公之師也著
述富而資業貧悉爲籌金付梓所爲詩古文亦得力於
師居多云座主莊羹堂侍講身後無人家以零落公在
江南日迎養其夫人至署爲之置產立嗣焉而後歸自
居鄉時喜拔寒畯設塾延師勤爲訓課及厯各任一如

居鄉精舍諸生常滿值鄉試年就署中建號舍百餘間
令諸生按期校藝以習場規士穎秀者以此多所成就
夫毓養人材造士也報答師門篤恩也鋤姦宄灑河渠
安民也決獄平反輸粟置田仁且智濟人之急不有其
財勇且義也董子有言壽者壽也公以厚德延洪嗣賢
濟美天之所壽良亦厚矣而恭人又以閭德贊助於內
孝慈溫惠傳於六親靡黎二老松鶴齊年壽孰多焉今
思所以壽公不敢以世俗之詞進徵事必以其實撰述
惟從其質凡所言擇其大者而已不及其細也謹書以

爲敘

冬日齋中看菊敘

菊以晚秋彌茂霜降猶蕃隱逸高流尤欣賞玩余久羈
塵網中謝田園籬落晚馨沈埋荒徑不覩芳儀十有餘
年矣自僑寓都門僦居蝸舍既鮮三徑之資遂乏半閒
之趣一花一草貨致肩頭三沐三薰非關手植

都下賣花多由

熏灌雖榮不久

曾微旬月便就枯萎朝菌薺英猶未足方其促

齡也頃癸酉春嬰痾偏疝今茲乙亥冬月方差如弛重
擔幸作平人開口而笑矣今歲晚寒節物較遲重九佳
辰秋花未獻比過小雪花信方闌供置齋頭朝華夕秀

鮮潤可餐就中黃者厥類尤夥蓋茲色爲花之壯觀也
有開最後纖白如玉風致蕭疏中含深綠淡雅絕倫以
意呼之爲碧玉纖蟹匡小屋爐火微熏茗汁尙溫頻施
津潤夜張方罽絡幕窗間資其安羅嗚呼茲非薰沐之
故智乎彼花肆欺人利其早開此貧士護花冀其遲落
非獨愛菊衛生亦然憐其衰暮保彼歲寒隨緣取足卽
遇而安有酒盈樽有書可觀書供下酒一醉陶然何必
城市之非隱而山林之非官哉于時人酣欲睡花淡無
言凝冰斜月燈火微煙醒後觀之殆不足存聊復傾寫

以快吾之筆端恨未遇潛明陶淵耳

以江郎之迴韻寫陶令之幽檢二妙一臺異音同歎
鮑雙五

花市買菊敘

余家齊魯會館去花市裁數弓居且經年而足未嘗入市者非養重也蓋無求也聞長老言京師通草花甲天下花市之花又甲京師每天欲曙赴者熙攘博致肩頭日間聆深巷賣花聲清揚而遠聞胥是物也余雖習聞久以其爲兒女子所用不足觀市旬而集例以四日丁丑重九前余聞市有菊花遂按其期身自入市擇取佳者率用百錢宿購瓦甌實以柔壤手自布置積二十餘品供置齋頭靜對移時淡而不厭童子喜花砲花砲者

爆竹也余爲兒時歲終出學邑市集率以四九日雖遭風雪輒入市買爆竹聞聲而喜投箸以趨買之百數十盈裹裹而歸又嘗入市看傀儡觀鸞豬鸞豬卽豪彘其毫如箭所稱箭豬者也今計其時已五十年所余忽忽老矣爆竹聲傀儡戲皆非所喜獨於菊花不能無意竊年六十一歲翁生也如寄儻自今更二三十年活未知去花市幾何許於此花能復好不聊追敘今昔所存以志余之感後來者或頗同斯好亦將有以觀焉時重九後二十有五日書

硯影敘

伊古有帝鴻氏之硯其詳靡得而聞已太公金匱硯之書曰石墨相著而黑顧亦不知用何等石也漢魏以降石無常家唐宋以來硯必端歛余謂琴不必濫脇號鍾期于鳴廉脩營硯不必端谿龍尾期于發墨益毫而已膠西劉大木椽清識士也工摩印書尤精相硯今年夏客都門館余曬書堂之東軒摩挲諸石擇其尤者爲鐫字訖并摹其影屬余敘其略云嘉慶乙丑又六月十八日